

Pertandingan Band Idol Shah Alam 2008

SHAH ALAM - Majlis Bandaraya Shah Alam (MBSA) akan menganjurkan Pertandingan Band Idol Shah Alam untuk memilih juara bagi bulan Mei di Pentas Laman Budaya, Taman Tasik Shah Alam bermula jam 5 petang, 25 Mei ini.

Pegawai Perhubungan Awam MBSA, Shahrin Ahmad berkata, enam kumpulan kugiran akan berentap sesama sendiri pada hujung minggu ini bagi memilih juara untuk bulan Mei.

“Selain acara persembahan daripada kumpulan kugiran yang bertanding, pihak MBSA juga ada menyediakan gerai menjual kraf tangan dan demonstrasi melukis gambar serta karikatur oleh penuntut Universiti Teknologi Mara (UiTM),” katanya.

Tambahnya, pemenang dalam program itu juga akan melayakkan mereka bertanding di peringkat akhir Pertandingan Band Idol Shah Alam yang akan diadakan pada Disember 2008.

“Aktiviti di Laman Budaya juga akan diadakan pada setiap minggu merangkumi aktiviti berbentuk kebudayaan dan kesenian, termasuk persembahan nyanyian dari artis-artis jemputan,” jelasnya.

Sehubungan itu, orang ramai adalah dijemput hadir untuk memeriahkan aktiviti ini, di samping bersantai bersama keluarga di Taman Tasik Shah Alam.

Sebarang pertanyaan lanjut, sila hubungi Shahrin di talian 03-55222734 ataupun 013-3380551.